

Hoki lelaki kenduri gol tewaskan Myanmar

KUALA LUMPUR 29 Ogos -

Tiada belas simpati diberikan oleh skuad hoki lelaki negara kepada Myanmar dalam saingan akhir Sukan SEA Ke-29 apabila berpesta gol ketika meraih kemenangan 14-0 ke atas lawan di Stadium Hoki Nasional Bukit Jalil.

Ini juga adalah pingat emas kali ke-16 skuad hoki lelaki negara dalam kempen Sukan SEA sejak 1971.

Pingat gangsa milik Singapura selepas menang 2-1 dalam aksi perebutan tempat ketiga menentang Thailand.

Jurulatih skuad hoki lelaki negara, Stephen Van Huizen berkata, pasukan amat yakin untuk memenangi perlawanan akhir terutama apabila bermula dengan baik.

"Kita beraksi di tahap terbaik dalam perlawanan ini dan semua pemain telah memanfaatkan setiap peluang mendapatkan jaringan. Dalam perlawanan sebegini tidak kisah siapa lawan yang ditentang pasukan negara harus mempamerkan tahap mereka yang sebenar.

"Cuma pada suku ketiga sahaja penyudah kurang tajam



PEMAIN hoki negara, Fitri Saari cuba membuat pukulan ke gawang gol Myanmar pada acara akhir hoki lelaki di Stadium Hoki Nasional Bukit Jalil, Kuala Lumpur, semalam.

kerana padang yang basah akibat hujan namun secara keseluruhan saya berpuas hati dengan persembahan pemain," katanya.

Dalam perlawanan akhir tersebut, Malaysia tidak berdepan masalah untuk menguasai saingan apabila mula

memberikan tekanan ke atas Myanmar menerusi jaringan seawal minit pertama.

Jurang antara pasukan Malaysia yang ketika ini menghuni *ranking* ke-12 dunia dengan Myanmar ke-85 dapat dilihat jelas ketika suku keempat perlawanan apabila

skuad hoki negara berjaya meraih lapan gol bagi melengkapkan keputusan 14-0.

Ini juga adalah kemenangan dengan jumlah jaringan kedua terbesar skuad hoki lelaki negara dalam kempen Sukan SEA Ke-29.